

國朝耆獻類征初編

國朝耆獻類征初編

國朝書獻類徵初編卷三十九目錄

宰輔三十九

阮元

富俊

英和

補錄

阮元



國朝耆獻類徵初編卷三十九

通奉大夫前署江西巡撫江西布政使司布政使湘陰李桓輯

宰輔三十九

阮元

一代之興必有耆龐魁壘之臣若唐之燕許及崔文貞權文公李  
衛公以經術文章主持風會而其人又必聰明早達敷歷中外兼  
享大年其名位著述足以弁冕羣材其力尤足提唱後學若儀徵  
相國真其人哉相國名元姓阮氏字伯元號雲臺祖玉堂官湖南  
參將始占籍儀徵嘗從大帥征苗有降苗數千大帥將戮之以死  
請得免及公貴人以爲陰德所致云乾隆五十一年公年二十三



舉鄉試入都與邵二雲王懷祖任子田三先生友作考工記車制圖解有江戴諸家所未及者五十四年成進士選庶常散館第一授編修逾年大考翰詹高宗親擢第一超授少詹事命直南書房修石渠寶笈召對稱旨上諭樞臣曰不意朕八旬外又得一人晉詹事充石經校勘官五十八年督山東學政撰山左金石志得搨本千三百有奇修鄭司農祠墓明年調浙江學政擢內閣學士嘉慶元年禪授禮成進文冊諭獎其典雅徵刻淮海英靈集二年修經籍纂詁百十有六卷選兩浙輶軒錄得詩三千餘家注曾子十篇橐凡三易三年擢兵部侍郎轉禮部仍直南書房四年調戶部侍郎充經筵講官副朱文正公總裁會試得士

最盛江都史致儼歛鮑桂星全椒吳肅武進張惠言閩陳壽祺高  
郵王引之蕭山湯金釗德清許宗彥涿州盧坤歙程祖洛興康紹  
鏞元和陳鍾麟歸安姚文田上元朱桂楨嘉應宋湘其尤著也明  
年授浙江巡撫時海盜蔡牽擾閩越疏請捐造大船巨礮並籌捕  
土盜剪艇匪之羽翼 璽書嘉獎勉以顯親揚名爲國宣力成一  
代偉人尋遣總兵岳璽敗賊於太平又奏獲杭紹等屬積盜數十  
先是錢塘江有小舟曰烏鴉船昏暮劫掠公廉得姓名捕寘諸法  
立緝匪章程七則檄沿海州縣力行保甲會艇匪竄浙奏請以總  
兵李公長庚總統三鎮舟師乃親駐台州督勦獲安南僞侯倫貴  
利磔之語在李忠毅公傳是年金處紹三郡災疏請賑卹有差蔡

牽旋寇平陽定海檄水陸鎮將擊走之增設育嬰堂經費銀歲四千兩六年立詒經精舍祀許叔重鄭康成兩先生延王述庵孫淵如主講席選高材生讀書其中課以經史疑義及小學天文地理算法許各搜討書傳條對不用扁試糊名法刻其文尤雅者曰詒經精舍集不十年上舍生致身通顯及撰述成一家言者不可殫數東南人才稱極盛焉又以浙東多古帝王名臣先賢陵墓繕冊疏報得 旨勤加防護修葺撰兩浙防護錄七年浙西饑疏請蠲豁平糶立普濟堂於省會每年冬賑粥四十日就食者日數千人八年立海甯安瀾書院建玉環廳學宮奏設學額復奏立杭嘉等郡昭忠祠請以歷年剿海寇傷溺弁兵三百人入祀均 從之六



月入 覲 召對者八 賜宴者三 垂問封公年齒甚悉 賞  
賚有加回任修海塘志九年疏請以李公長庚總統閩浙各鎮專  
勦蔡牽遂敗牽於定海會浙東水災疏請蠲緩平糶并率屬捐賑  
建白文公祠於西湖撰經郭及海運考兩浙金石志積古齋鐘鼎  
款識十年賑杭嘉湖三郡饑檄所屬多設粥廠分男女爲二出入  
進退皆有法病者藥之老疾者別爲廠婦女有廁篷全活數十萬  
人六月父憂歸里居成十三經校勘記二百四十三卷撰 皇清  
碑版錄編瀛舟書記重刻石鼓文置揚州府學十二年入都進四  
庫未收書六十種作提要上之得 旨獎覽補兵部侍郎 命赴

河南勘獄再撫浙江先是公撫浙五年凡安南鳳尾水澳等幫海

盜勦撫散除幾盡所餘者土盜張阿第等十餘艘耳自蔡牽得志於閩大掠臺灣李公長庚死事至是牽從安南回棹聚至五十艘而張阿第亦有船三十餘艘勢張甚乃親赴甯波督勦申嚴接濟賊糧之禁先後敗賊於沙鑊洋黑水洋落伽洋等處賊勢始漸蹙公復薦邱公良功爲浙江提督又立專注蔡牽分船隔攻之法於是邱公及福建提督王公得祿遂以十四年秋殲牽於温州之外洋矣坐失察學政劉鳳誥代辦監臨舞弊事奪官 命以編修在文穎館行走十五年遷侍講兼國史館總纂勅立儒林傳得百四十六人但述學行而不區分門逕又擬勅文苑傳未就又集 本朝天文律算諸家作疇人傳累晉少詹事內閣學士十七年往山

西河南勘事遷工部侍郎八月授漕運總督立糧艘盤糧尺算法  
頒行各省十九年調撫江西時豫東邪教初平餘黨煽亂餘千匪  
目朱毛俚等假託明裔謀逆公率臬司馳往擒獲胡秉耀等十七  
名實諸法得 旨嘉獎加太子少保 賞戴孔雀翎尋獲崇義縣  
天地會匪鍾體剛進賢縣擔匪曾文彩龍南縣會匪鍾錦龍長甯  
縣會匪郭秀峯瀘溪縣會匪陶省三等各論如律民情乃安公在  
江西改建貢院號舍拓基修省城章江水閘校刻十三經注疏以  
惠士林二十一年調撫河南十一月遷湖廣總督奏建江陵范家  
隄沔陽龍王廟石閘以蘇水患明年調兩廣總督奏建大黃濬大  
虎山肇慶府各礮臺又奏建南海縣屬桑園圍石隄修廣東通志



二十四年秋入京祝嘏召對十一次 賜克食四十七次 恩賚有加 仁宗皇帝手酌玉杯 賜公同受 賜者惟江督孫公玉庭川督蔣公攸銛而已二十五年立學海堂以經古學課士如在浙江時改建貢院號舍如在江西時道光元年奏設卹蔭局修廣州城及城北鎮海樓建三水行臺書院刻江蘇詩徵百八十三卷作者五千四百三十餘人尋刻 皇清經解爲書百八十餘種爲卷千四百公在粵十年兼署廣東巡撫者六粵中水陸向多盜分飭屬嚴拏前後數千計其賀連交界姑婆山素稱盜藪公調兵擣其巢患乃息兩洋貿易惟英吉利國貨最多性尤狡黠嘉慶二十一年嘗遣使入貢未許成禮而回逾年公莅粵疏請嚴禁鴉片

首以嚴馭洋商夷商爲務遇事裁抑之夷船在黃浦殺人公嚴飭洋商必得兇犯乃已商不能庇犯乃自刎死有擊死民婦者亦予絞決抵罪道光二年冬英夷護貨兵船殺死民人二公飭洋商及管事大班縛犯以獻大班委其責於兵頭卽飭傳諭兵頭獻犯詭稱夷民互有殺傷冀相抵賴公持之力夷目等聲言將揚帆歸國停貿易公給印諭言願歸卽歸 天朝並不重爾等貨稅於是各船皆出海口然非其志也仍潛泊外洋以待日久折閱多其兵船又先遠遁大班等乃稟求回岸貿易俟下次貨船抵粵時縛犯來獻公復給印諭兵船不許復來其見在貨船暫許貿易續到者如不能縛犯仍嚴拒不許入方事之殷商民官吏皆惶惶或言關稅



將自此大紕且慮激變爲 朝廷憂公曰 國體爲大稅數爲輕  
且索兌理長不可爲所欺脅力持二三月夷目始有乞回貿易之  
稟自是兵船亦不敢復來公調任兵船卽踵至海疆乃自此多故  
矣六年夏調雲貴滇省鹽政久抗敝歲紕課十餘萬公首劾蠹吏  
力杜井竈走私弊七年奏銷溢額萬六千兩明年又數倍之乃疏  
請酌留溢額銀兩備邊費 從之騰越極邊有野人一種茹毛穴  
處時入內地劫掠爲邊患而保山等處別一種邊夷曰獐獐本土  
司所轄也以墾田射獵爲生精於桑弩毒矢野人畏之公乃籌邊  
費萬金招獐獐三百餘戶駐騰越邊界給地屯種以禦野人會謠  
言總督將帥兵親討於是南甸隴川等土司帶領二十餘寨野人

來乞降並獻木刻設誓八年十二月入覲 召對十次 賜紫  
禁城騎馬及 御書春帖子尋 召入乾清宮 面賜福壽字賞  
賚無數十二年遷協辦大學士仍畱總督任十三年二月 陛見  
時年七十矣 賜御書福壽字亮功錫祜扁額及尙方珍物爲公  
壽尋 命充會試副總裁四月回任公督滇黔十載值車里土司  
刀繩武與其叔刀太康鬪因而脅官求助其時漢夷流言皆謂  
當助姪滅叔公不爲動檄鎮道等擊敗繩武另擇人承襲亦不追  
殺要功其後越南保樂州土官農文雲謀叛其國聚眾戕官經交  
趾兵追捕公飭沿邊嚴防毋令一夷竄入亦不得生事貪功妄殺  
手詔嘉之其鎮靜得大體多類此十五年拜體仁閣大學士管

兵部事充經筵講官教習庶吉士兼署左都御史 宣宗兩次謁

陵均 命畱京辦事十八年以足疾請告疏再上 優詔許致

仕仍食半俸瀕行加太子太保公歸里後築別墅於湖莊曰南萬  
柳堂蓋以別於馮文毅之都城別業也二十三年公壽八十復拜  
御書扁額楹聯福壽字及尙方珍幣之 賜二十六年丙午以

重赴鹿鳴宴加太傅銜食全俸公疏謝 手敕報曰願卿福壽日

增以待三赴鹿鳴之盛事也考 本朝大臣生前加太傅者自金

文通洪文襄范文肅鄂文端曹文正長文襄外得公而七公以後

惟潘文恭世恩而已餘皆贈自身後者也二十九年十月薨年八

十有六 優旨悼卹 賜祭葬 予諡文達所著書曰學經室集



先後刊行海內名宿著述如錢辛楣三統術衍地球圖說謝東墅  
食物百詠張皋文虞氏易儀禮圖汪容甫述學錢漑亭述古錄劉  
端臨遺書凌仲子禮經釋例焦里堂雕菰樓集鍾鼓崖考古錄孔  
龔軒儀鄭堂集胡西琴詩集張解元貴吏部詩集僧誦茗蔗查集  
李四香算書凡數十家子常生官清河道前卒福平涼府知府祐  
舉人官知府繼配孔氏工詩著有唐宋舊經樓橐

右事略李元度撰